

KALALLISUT

ILLOQARFIMMI EQQUMIITSULIAT

NUUK EQQUMIITSULIORNIKKUT
PAASISASSARSIORFIGIUK



nk



1. Blok 10-mi aamma Blok 5-imi qalipakktat

Guido Van Helten aamma Stéfan Baldursson. 2014

Blokkini qalipanneqarsimasut pinner-saataaqqissaaratik illoqarfinni eqqumiitsuliarineqartartunut eqqaanarnerupput, tuluttut Street Art-imik taaneqartartut. Blok 10-mili aamma Blok 5-imi street art-iliarineqarsimasut Kommuneqarfik Sermersuumit taperneqarlutik suliarineqarsimapput, isumassarsiarli suliarinnikkumanerlu eqqumiitsuliortuninnganneerpoq.

Stéfan Baldursson Islandiminngaanneersuuvoq, taassumallu arnaq nanorlu Blok 10-mut qalipassimavai. Arnaq nanorlu sipisap tungaanut isigipput. Sipisap taanna Nuummiorpassuit ullut tamaasa suliaritoraangamik soraaraangamilluunniit aqqutigisarpaat.

Guido Van Helten Australiameersuuvoq, taassumallu Blok 5-imiittoq qalipagarlugu. Tunumi W. Thalbitzerip 1906-imi piniartoq tivasoq assilisimavaa, taannalu malillugu Blok 5-imiittoq qalipagaavoq. Piniartoq taanna ateqarsimavoq Nujappik. Nujappik aamma Søren "Solo" Nielsenimit (1874-1948) qalipanneqarsimavoq, taannalu qalipagaq Nuummi Eqqumiitsulianik Saqqummersitsivimmi takuneqarsinnaavoq.



2. Qullilerfimmi iigaq, ujaqqat, qalipagarlu meterinik 5-nik takissusilik

Jens Thordahl Christensen (In. 1965) 2006

Qullilerfik qanga qatanngutiginniit (herrnhutere) aqqutaanni qullilertarfianni inissisimavoq. Qanga qulleq ikumasooq tassunga nivinngarneqartarsimavoq, illoqarfiup taartuinnaap ingerlaarfigineqarnerani inuusuttunit ator-neqartarluni. Taamaammallu Qullilerfimmik tamanna taaneqartarpoq.

Allakkeriviup isaariaaniippoq poor-tukkanik aallertarfik aappaluttoq. Taassuma tunuani iikkamut nigaliliarpas-suit qalipanneqarsimapput. Igaq zink-imik qallerneqarsimavoq biilinullu qalipaatiqineqartartumik nigaliliat qalipagaallutik. Nigaliliat qanga arnat Inuit kakiortittarsimanerannit isumasarsiaapput.

Eqqumiitsuliortup nigaliliat qalipan-neranni telefonbogimi atit ataasiakkaarlugit atuartarsimavai, nigaliliaq ataaseq ateq ataaseq.

Isaariap qeqqaniittoq ujarak Nuuminngaanneersuuvoq, siorarterneqarsimallunilu. Allakkeriviup iluani qalipagaq 5 meterimik takissusilik nivingavoq. Eqqumiitsuliortup sersersuaq Kallaallit Nunaannilu pinngortitami inissaqarnersuaq isumassarsiorfigisimavaa.

Allakkeriviup silataani inuinnaat aq-qutaata qatanngutiginniit aqqutigisarsimasaat malippaa, qulaatungaani-lu qullilerfitoq takuneqarsinnaalluni.



3. "Fisk på vej I & II" – Qullilerfimmi majuartarfinni eqqumiitsuliat

Camilla Nielsen (In. 1972)

Qullilerfimmi isaariani marlunni suluppaakktat iikkami ingerlaarput. Pisiniarfiit Panasonic Center aamma In Fashion isaariaani majuartarfiit qummukartut takuneqarsinnaapput. Ikkami suluppaagarujussuaq ingerlaarpoq. Qullilerfiup illuatungaannukaraanni, isaariaq alla akerlianeqqissaaq takuneqarsinnaavoq. Tassani suluppaakktat arlal-lit, isai ammalloriit, majuartarfinnut tikkuarsimapput.

90-ikkut qeqqani Camilla Nielsenip suluppaagaq Kalaalliaqqami saneqqus-simavaa. Suluppaagaq itinersami isigisinnaasunik ammallorinnik isilik. Taamanili arlaleriarluni suluppaagaq Camilla Nielsenip eqqumiitsuliamini sammisarsimavaa. Suliarineri tamaasa ilusilersornera ajornannginnermik ersersartarlugu – naggataagut suluppaagaq ilisarsaajunnaartillugu, taamaali-gaagamillu aallaqqaataaniik suluppaagaq suliareqqilertarlugu. Akryl, tusch aamma qalipaati imilertarissat atorlugit suliarisarpaa.

Suluppaagaq angisoorsuaq iikkamiit anillangavoq, angissusiminillu majuartarfiit ineerannguat ulikkaartutut illugu. Suluppaakkani ataatsimoortuni isai malunnarninngorput. Ingerlaartitsisutut.



4. Grønlandsbankenimi saqqummersitat

Inuinnaat aqquataanni biilit unittarfiat qaangerukku Grønlandsbanken angusuat. Isaariaanni, ataani qulaanilu, eqqumiitsulianik saqqummersitsisoqartarpoq. Saqqummersinneqartut amerlanertigut pisiarineqarsinnaasarput. Amisut tungaannut ingerlaaqqigut. Uluni seqinnerfiusuni meeqqat Amisut qallorfigisarpaat.



5. Amisut

Naja Rosing-Asvid (In. 1966) 2009

Puisit ataatsimoortut taaneqartarput amisut.

Ilusilersukkami puisit imminnut perlagussimallutik erserput.

Ilusilersugaq 2009-mi Namminersorneq eqqunneqarmat saqqummersitaa voq, inissisimaffigisaa tamarmi biileqarfiujunnaarluni atoqqaarfissiorneqarmat. Naja Rosing-Asvidimit ilusilersugaavoq. Naja illussanik titartaasartut ilinniarsimasuuvoq.

Amisut akianni Hotel Nuuk inissisimavoq.



6. Hotel Nuuk isaariaa

Anne-Birthe Hove (1951-2012)

Nota Bene affarlia manna kollegiatut atorneqarpoq. Sukat arlallit igalaakkut takusinnaavatit. Sukat kanngussammik pinnersarneqarsimapput. Kanngussammik maligaasaliat sukanut ikkussuunneqarsimapput, assigiinngitsunillu allalersorneqarsimallutik.

2001-imi ini taanna hotelimut isaariatut baritullu atorneqarsimavoq, taamanilu Anne-Birthe Hovep pinnersarsimallugu. Barip pinnersaatigisimasaata sinneri maanna Nuummi Eqqumiitsulianik Saqqummersitsivimmi takusinnaavatit. Kanngussamik suliat pingasut, taaguutillit "Natteravne" (unnuap tulu-gai), aamma annoraaminermut naqitikkat 14-it. Annoraaminermut naqitikkani Nuup illoqarfiata ilisarnaataa, qaqqaq Sermitsiaq takuneqarsinnaavoq. Igalaq angisooq, sioralitsigaq barimi inimut avissaarutitut atorsimagaluar-toq tammarnikuuvoq.



7. Katuap saavani ujaqqani titartakkat

Jeppe Gitz-Johansen (In. 1939)

Katuamiittup Cafetuap akiani ujaqqat arfinillit inissinneqarsimapput. Ujaqqat kaajallakkaanni qaavatigulluunniit misissoraanni qiperukkat assigiinngitsunik qalipaattillit takuneqarsinnaapput. Runitoqqanut, qaarusunnilu qalipakkanut itsarnisanut eqqaanarsinnaapput, allaalluunniit seqinermut

qinnutitut eqqaanarsinnaallutik. Maaniittoqarsimaneranik ersiutaapput, maaniissimasut illerngi imaluunniit assiliartai.

Jeppe Gitz-Johansenip ataatami, Aage Gitz-Johansenip, suliai Katuami saqqummersinneqarnerannut atatillugu ujaqqami kigartukkat suliarisimavai.



8. Katuami qalipakkat, saqqummersitalu

Aage Gitz-Johansen (1897-1997)

Cafemi qulaanukarit. Tassani Gitz-Johansenip qalipagai takulluarnersinnaavatit. Gitz-Johansen taaneqartarsimavoq "Qalipaasorsuaq".

Gitz-Johansen qallunaajusimavoq, Kalaallit Nunaannulli saaminullu asanilersoorsimalluni. Kalaallit Nunaani angalasarsimavoq najugaqartarlunilu, taamatullu saamit akornanni aamma. Angalanermini paasisani, misigisani, aamma oqaluttuatoqqat Kalaallit Nunaanneersut saamineersullu eqqumiit-suliornermini atortarsimavai.

Gitz-Johansenip titarneq pinnguarsarpaa – ilusilersukkaminik qalipaariarluni annoraaminermut nalimasumut inissillugit. Qalipagai Kalaallit Nunaani aaliangersimasumik oqaluttuarniartuunngillat; inuit soqutigisimavai tigu-artistimaarfigalugit, arnaq, kulturi, nunap qalipaatai, qalipaallu tungujortoq – tamakkualu atorlugit qalipakkani suliarisarsimallugit.



9. Katuami saqqummersitsinerit

Cafep tunuata tungaa Katuap saqqummersitsivittut atortarpaa. Aasat tamaasa Eqqumiitsuliornermik ilinniarfimmi ilinniartut tassani saqqummersitsisarput. Aammattaaq eqqumiitsuliortut kattuffiat, Kimik, ukiut tamaasa tassani saqqummersitsisarput.



10 Katuami pinnersaasersuineq

Buuti Pedersen (In. 1955)

Seqineq qaammallu pillugu oqaluttuatoqqami oqaluttuarineqarpoq angut najaminut asannilersoorpoq. Najaata issoq tigusimavaa, orsumullu kinissinnarlugu kukussimallugu, nassarlugulu qimaalersimalluni. Aniata malillugu aallarsimavoq, issorli tigummisani ikinngitsoorsimallugu. Maannalu ania qaammatitut ingerlaartuarpoq, najani seqininngorsimasooq malersorlugu. Marluullutik ulittarneq ukiullu ingerlaartarnera aquppaat.

Katuami saaffiginnittarfiup qulaatungaani oqaluttuatoqaq taanna iikkamut qattunerusunngortillugu assitalia-rineqarsimavoq. likkami angut qaammatitut, arnarlu seqinertut inissisimapput, iigaq malillugu, nunap assinga ullorissallu aamma takuneqarsinnaallutik. Akornerminnullu ungasissusaat taannaajuassalluni.



11. Katuap saavani qaannat

Isle Hessner (In. 1962)

Katuap saavani qaannat pingasut napasut takuneqarsinnaapput. Issiavigineqarsinnaapput, naapiffigineqarsinnaallutik, pinnguafigineqarsinnaallutillu – naapittarfiullutillu qasuersaarfineqarsinnaasut.

Isle Hessner savimineq, betoni qisullu atorlugit suliaqartarpoq. Atortut oqimaatsut illuliornermi atorineqartartut. Uani savimerngip betonillu anorimut aputinullu oqquiffiusinnaasumik pilersitsipput.

Silap anorillu aamma savimineq suliarerujoorpaat, saviminermik kajortitilutik qanganisarpalaartitsilerlutillu. Ukiukkut betoni aputinik qallernerqartarpoq, qaannat kisimik ersittarlutik.



12. Nuuk Centerip aamma Katuap akornanni naangisaarfiit

Peter "Kujooq" Kristiansen

Katuap aamma Nuuk Centerip akornani, Pascuccip akiani, nunaminngaanniik puttussuuttoqarpoq. Ivikkat portogatilugit ujarak qillarittuinnangorlugu manissagaq takuneqarsinnaavoq.

Ujaqqat allat misissoraanni aalisakkat miterlu takuneqarsinnaapput.

Maaniipput, ujartorneqanngikkunillu malugineqaratik saneqqunneqaannartarlutik.



13. Namminersorlutik Oqartussat saavani Kaassassuk

Simon Kristoffersen (1933-90)

Kaassassuk tassaavoq nukappiaraq angajoqqaanngitsoq, nunaqarfimmini ikkatigineqartartoq, aatsaallu Pissaap Inua naapikkamiuk inuunera allanngortoq.

Simon Kristoffersenip ilusilersukka-minni Kaassassuup aamma Pissaanerup Inuata naapinnerat takutippaa. Isigisaat assigiimmik sammiveqanngillat. Oqaluttuatoqqami Kaassassuk Pissaap Inuanit kaavissuunneqartarpoq, Kaassassuup ajugaarunnissaata tungaanut.

Kristoffersenip Pissaap Inua oqimaattunngorlugu suliarisimavaa. Ajasoorneqarsinnaanngitsutut nakuarsuurtullu. Qungaseqanngitsoq, sorlui angisuut, taamalu isai ammalorfaariit. Niuilu tassaangaannaq naallutik, soorlu naggu-aatsup niui.

Pissaap Inuata naapinnerata kingorna, Kaassassuup nukini nutaat misilerarlugit angalussanngorsimavoq, nukini ilikkarluarniassagamigit.

Ilusilersugaq 1973-imeersuuvoq, Det Kongelige Danske Kunstakademimi Københavnimi suliaalluni, Simon Kristoffersenip ilinniarfigisimasaani. Ilusilersugaq Danmarkimi Rigshospita-lip saavani 1987-ip tungaanut inissisimasimavoq, taassumallu kingorna Kaallit Nunaannut nassiunneqarsimal-luni. Aasat tamaasa ilinniarnertuunngorlaat ilusilersugaq kaajallallugu qit-tarput.



14. Sassuma Arnaa

Christian "Nuunu" Rosing (In. 1944)

Sassuma Arnaa immap naqqani najuqarpoq. Immami uumasut tamaasa naalagaaffigai. Inuit pissuserissaangikkaangata, ipeq ajortuliallu Sassuma Arnaata nujaanut ilaguttarput. Taamaattoqaraagat Sassuma Arnaata uumasut noqilertarpai. Inuit angakkunik Sassuma Arnaanut, immap naqqanut, aallartitsisarput, aqut navianaraluartoq. Angakkup apuukkuni Sassuma Arnaata nujai salilersarpai, illaarlugillu. Sassuma Arnaata nujai salinneqareeraangata uumasut iperartarpai, tullissaani inuit pissusiloqqilernissaata tungaanut.

Ilusilersugaq Christian "Nuunu" Rosingip suliaraa. Ilusilersugaq ilaatigut nunamiittarpoq, ilaatigut immami. Immap ulittarnerata tinittarneratalu tamanna aquppa.



15. Aqquserngup "Kuussuaq" isuani Inussuk

Niels Motzfeldt

Nuutoqaq kangerlullu isikkivigalugit ilusilersugaq "Inussuk" inissisimavoq. Inussuk isumaqarpoq inungasoq. Qaanga inussuit sumiissusersiutitut atornerqatarsimapput, immamiit nunamiillu.

Ilusilersugaq betonimik, kanngusammik ujaqqanillu sanaajuvoq. Niu-lui pingasut tassaapput Kalaallit Nunaanni inuiaqatigiit, avannaani, kita-

ni, tunumilu. Inuiaqatigiit ilusilersukami niulutut ataqatigiilersinneqartut, imminnullu ikorfartortut. Ilusilersukamiittut ujaqqat Kalaallit Nunaata sine-riaanit tamanit ikkussugaapput.



16. Tuapannguani napasuliani tulukkat

Rikke Diemer

Napasuliat qullerpaavani tulukkat ingerlaartutut ipput.

Tulukkat illut qulaatungaani pinngu-arlutik timmioraarternerat Nuummi ukiuuneranut atatilluinnartarpara, eqqumiitsuliortoq Rikke Diemer Tuapannguani pinnerasaasimanini pillugu taama oqarpoq.

Siullermik Tuapannguani blokkini pingasuleqiisuni Blok Q-mi tulukkanik pinnerasaateqarsimagaluarpoq. Blok Q isaterneqarnerata kingorna napasuliat nutaat arfineq marluk sananeqarsimapput, tassanilu tulukkat pinnerasaataallutik timmioraaqqilersimallutik.

Napasuliat ungasianit isigigukkit, pinnerasaatit ataneri takusinnaalissavatit.



17. Kommuunip allaffeqarfiani Avittat

Thue Christiansen (In. 1940)

Kommuunip allaffeqarfiata silataani allalersugaq nivingavoq, takunngitsoorneqariaannaasoq.

Eqqumiitsuliaq avittanit isumassarsimalluni suliaavoq – nunani issittormiuni Kalaallit Nunaannilu ammit atorlugit allapalaalari-neqartartut. Ammit qalipaaserneqarsimallutik mikisuaraanngorsinnarlugit kaminnut atisanullu

pinnerasaataasarpur. Seqinneraangat eqqumiitsuliaq qillalaartarpoq.

Eqqumiitsuliaq Thue Christiansenimil suliaavoq, taassumallu aamma Kalaallit Nunaata erfalasua ilusilersor-nikuullugu.



18. Kommuunip allaffeqarfiata isaariaata eqqaani kissaviarsuk

Teqeqqumi orpikkat akornanni kissaviarsup niaqua puttusimalaartoq takusinnaavat. Betonimut inisseqqavoq. Isai qillersut assersinnaavatit, sigguatagiarsinnaavat, niaquatigulluunniit pattalaarlugu.




19. Nuummi Eqqumiitsulianik Saqqummersitsivik

Hotel Nuummi igalaakkut marserpit? Anne-Birthe Hovep sukarutinit pinnerasaatai kanngussammik sanaat takuigit? Nuummi Eqqumiitsulianik Saqqummersitsivimmi taamani Hotel Nuuk-iunikup pinnerasaatigisimasaata sinneri nivingapput.

Eqqumiitsuliat katersaat, Nuummi Eqqumiitsulianik Saqqummersitsivimmiittut, Svend aamma Helene Jungep katersaanit tunngaveqarput. Svendip aamma Helenep katersaatik saqqummersitsivillu 2005-imi Nuummiunut tunniussimavaat. Saqqummersitsivimmi eqqumiitsuliat Kalaallit Nunaanni eqqumiitsuliornermik oqaluttuarisaanermi qanganisaanerusut nutaanerullu takuneqarsinnaapput.

200m²-isut atsigisumik nutaamik inersuaqarpoq, tassanilu kalaallit eqqumiitsuliortut suliaannik taarserartunik saqqummersitsisoqartarluni.



Nuummi Eqqumiitsulianik Saqqummersitsivik Nuuk Kunstmuseum // Nuuk Art Museum

Kissarneqqortuunnguaq 5
3900 Nuuk
Greenland
(+299)32 77 33
nk@sermersooq.gl
nuukkunstmuseum.com

Ukiukkut ammasarfiit:

Sisamanngorneq 13-19
Tallimanngorneq – Sapaat 13-17
(isumaqatigiinnikkulluunniit)

Aasakut ammasarfiit:

Marlunngorneq – Sapaat 13-17
Sisamanngorneq 13-19
(isumaqatigiinnikkulluunniit)

Colourful Nuuk

nk

NUUMMI EQQUMIITSULIANIK SAQQUMMERSITSIVIK
NUUK KUNSTMUSEUM // NUUK ART MUSEUM